

四庫全書

集部

欽定四庫全書

兩宋名賢小集卷一百八十六

宋 陳思 編

元 陳世隆 補

雪溪詩集二

幽居

幽居寂無事晨起伴僧禪  
曉澹巖前月秋明水底天  
望鄉書斷雁問路客回船  
阻絕平生友清遊有夢傳

別故人張孝先

平生嘗嘆少陵詩，豈謂殘生盡見之。  
共脫干戈身偶在，各懷鄉國語猶悲。  
又尋芳草春風路，猶聽孤舟夜雨時。  
避地海山周萬里，此行無處寄相思。

訪闕子開兄弟於餘杭懷先世舊契

山嵇交契自當年，重到同鄉各惘然。  
百里山川清似舊，兩家子弟老於前。  
疎梅開處數枝玉，小雨來時一段烟。  
歲晚不妨相會數，溪頭尚趁有歸船。

項在廬山與故友可師為詩社嘗次韻和予詩云  
空中千尺墮柳絮溪上一旗開茗芽絕愛晴泥翻  
燕子未須風雨落梨花重江碧樹遠連雁刺水綠  
蒲深映沙想見方舟端取醉酒酣風帽任欹斜後  
三十年避地剡溪山中時可師委蛻亦二紀矣靈  
隱明上人追和此為贈感念存沒淚落衣巾因用  
韻謝之

昔訪廬山惠遠家尋春草木未萌芽自從柳折烟中色

不守梅開雪後花事往  
泪多添海水詩來恨滿  
箕河沙  
驚回三十年前夢放鶴  
峰頭日未斜

溪上觀雪

沙洲莽蒼水雲昏  
雪落寒溪鏡有痕  
山際疎鐘烟際寺  
林邊微徑水邊村  
天涯歲月行將盡  
人世窮愁孰與論  
憶與鄒枚同賦詠  
人非事往但心存

送史純夫歸餘姚

霜晴九月交  
送子越東門  
同舟此水上  
再對波清渾

聚散三十載惟此一意存邦國有大慶去承曠蕩恩我  
老百不堪視子猶弟昆新寒黃菊枝落照黃葉村慘愴  
欲別語零落未歸魂臨分吐情實衰境意彌敦

黃州棲霞樓蘇翰林所賦小舟橫截春江是也曾  
竑父罷郡畫為圖求詩

銅雀不得鑠二喬春江亦夢携西子此樓縹緲想風流  
此恨纏綿在雲水洞庭葉下思湘君不獨陽臺雲雨神  
精誠感通若相遇夢境幻境皆成真黃州刺史清如鏡

水光山色心同瑩  
牧之出守到元之  
誰解把詩聞  
萬乘圖成携得千里行  
孤帆趁落斜陽城  
江頭莫指挽鄧處  
離合古今同一情

和明上人見贈

西湖梅蘂暗香浮  
錫杖凌空過沃洲  
後會重尋人更老  
顏光不駐水爭流  
夕陽天際青山出  
暝色烟中白鳥留  
此境只曾支遁賞  
剡溪今始得湯休

六見月華虧又盈  
却來松下笑相迎  
事銷腸雪渾非舊

人似寒梅獨有情  
香火舊緣生理足  
烟霞新志著書成  
明朝又向千峰去  
猶恐時人識姓名

寄陳彥山

送君憶昔上鰲山  
愁折江梅踏雪還  
別後重添十年老  
靜中猶借半生閒  
文章千古心空在  
書史三冬手自刪  
歲晚山中有琪樹  
傷心何日得同攀

小立

茅屋藤蘿外  
憑欄烟靄間  
亂蟬催暑去  
急雨帶秋還  
路



入雙溪口門當四面山詩成題未有翰墨伴清閒

舟中夜雪讀正卿教授近詩輒賦鄙句并以為別  
百年半羈棲輕與故山別回首千萬峰飛夢不可越弭  
棹濠上亭非卻愴時節朝號迴野風夜聽孤舟雪濕薪  
無煖焰燭泪共明滅癡坐增灑然何以慰清絕斯時咏  
君詩心抱益澄澈未見觀魚莊先得馭風列荆玉出此  
邦誰獻復誰剛山川漫竒麗文物久消歇君詞吐白虹  
神寶疑不沒我欲賡餘思景行好句拙如違勾漏令未

得丹砂訣萬里烟雲開揚舲及明發荆山自茲遠雲濤  
渺天末兩地見梅花相思不同折

無題

三月柳花飛東風繡香國挂影弄春光飛瓊悵分缺雲  
輿返青霄翠浪翻天末閨苑桃李花莫使芳香歇緬想  
霞中人芙蓉艷秋色烟鸞吟碧空行雲不停刻何事寄  
紅埃悲聲調綠髮神觀洞太虛紫清注金格玉宸丹鳳  
檢詞章煥瓊笈誰執招真旗笙簫下空闕靈光湛法身

生死本無別妙造化機陰陽時出沒欲識天中真寒  
江浸明月

將卜山居寄懷

山居香火伴殘經幽絕全家在畫屏黃葉村藏一溪碧  
白雲堆擁萬峰青安知遇酒分賢聖但可與人同醉醒  
萬事休心同白髮更須結託老人星

除日得銅溪老人書

除日相思輒寄詩流光不特我衰遲歲窮滄海波濤急

天冷空山鳥獸悲一氣先觀雲暖處百花猶避歲寒枝  
迎年送臘須臾夢正是須彌不動時

必明菴

佛心猶日出何曾碍須彌散為普光明合作四威儀萬  
古止此日羣目盡見之普現一切水君自分澠淄高垂  
大圓鏡君自存妍媸方寸無盡燈無處存思維高禪聞  
妙道行作人天師維摩開丈室庵成更求詩衆說列山  
嶽吾以一理推萬古聲一槩我初拙言詞至現莫如心

舉念周四維心明乃本明盡埽棘與茨豈知都用悔隱  
顯雨不知大千在髮毫聖言不吾欺

古漁父詞十二首

漁父家風我所知家風要與道相宜不懷貪餌吞鈎意  
常似絲綸未下時

雨中漁艇一聲歌夾岬青林照碧波躍馬更誰思往事  
紅塵千丈奈人何

萬里號風雪滿山黃蘆映靄水汪灣九衢朝馬愁泥滑

不識魚翁興未閒

風波穩處釣舟閒  
雲去諸山暝不還  
江面一峰何所似  
青銅鏡裏綠雲鬟

千古高人張志和  
浮家泛宅老烟波  
不應別有神仙境  
祇此滄江一釣蓑

虞舜遺風遠可尋  
烟波一棹古猶今  
九疑莽蒼三湘濶  
盡是雲山韶護音

曾見三閭屈大夫  
強將清濁較賢愚  
如今更覺前言拙

醒醉由來本不如

風裊溪頭釣線多  
戲魚無奈巧依荷  
直須飄盡浮萍草  
盡放青天照碧波

禹門三級浪千重  
變化騰飛豈有踪  
寄語魚蝦休上釣  
要看頭角是真龍

得即歡忻失即憂  
死生輪轉暗相讎  
那知垂釣非真釣  
不在絲綸不在鈎

船子禪師意未平  
萬波要喻境中情  
魚寒不食清池釣

何處歸舟有月明

波清百尺見游鱗  
水色天容自古新  
昨夜西江浴明月  
冰輪玉兔絕纖塵

秀遠亭

鏡似冰壺表裏清  
我來閒伴白雲行  
四山迤邐青圍野  
一水蜿蜒綠繞城  
試問春來觀秀色  
何如雨後聽泉聲  
昔人飛馭烟霞外  
落日空含萬古情

送呂道師還天台



結宇孤峰蘚徑危身閒鷗鳥信忘機水聲山色何今古  
物態人情果是非子踏白雲來問道我垂華髮自生輝  
赤城歸去松門晚萬里秋容上客衣

早秋寄昔慧老且弔慈受老師之亡

昔日禪河早預流老尋支許劍中遊一枝數粒同過夏  
萬壑千巖相映秋眼看珠沉滄海底心傷塔聳亂峰頭  
不須月落龍天泣萬古白雲無去留

題洛神賦圖詩并序

風雅頌為文章之正至屈原雜騷兼文章正變  
而言之湘君湘夫人山鬼多及帝舜英皇以繫恨  
千古宋玉賈誼師其餘意作招魂賦鵬極死生憂  
傷怨懟之變亦兼正與變而為言耳其後李太白  
作遠別離亦云九疑連縣皆相似重瞳孤墳竟何  
是李當塗編次以此詩為謫仙文集第一篇亦以  
祖屈原悲英皇本意耳而韓退之作黃陵南海廟  
碑文章詞指非世間詩也蓋平生周造化妙理已

多至是方能發鬼神之情然後幽遠荒忽竒怪無餘  
蘊於天地矣文章必能盡羈旅風霜山行水宿極  
其患難離別悲傷則真情乃見與夫男女之際鬼  
神之狀死生之變態幽顯表裏內外洞達然後為  
至焉曹子建與七子並遊而獨能脫遺建安風格  
作洛神賦雖祖屈原而能激其餘波侵尋相及矣  
非託寓於婦人神仙亦安能至此也近得顧凱之  
所畫洛神賦圖撫本筆勢高古精彩飛動與子建

文章相表裏因賦一詩其後蓋屈原賈誼子建  
其幽恨莫伸一也故文章能達其所存以極窮  
古鴻荒之理學者可以辨是矣

曹公文武俱絕倫傳與陳王賦洛神高情寓託八荒外  
曾是親逢絕世人五官郎將莫輕怒椒房自是袁家婦  
聞道生時覆玉衣便是於今腰束素驚鴻翻然不重顧  
射虎深窵更淒楚不將降虜賜周公先識禍機揚德祖  
此意明明可自知豈有神人來洛浦盡用平生八斗在

七步那能說微步楚騷日月常爭光湘夫人後誇高唐  
丹青盡寫鬼神趣筆端調出返魂香妙畫高天盡天藝  
神理人心兩無異此情萬古恨茫茫且為陳王說餘意

妾薄命

并序

夜讀齊梁諸集見多有此作因賦二篇繼其聲

寒閨有靜女十載念遠征命似絳綃薄身同朝路輕存  
心合懽綺待得機杼成從來君獨賞寧肯賣都城憑夢  
欲寄遠舊路春草生獨夜理瑤琴泪燭剪不明待誰相

應節要自不勝情會有不眠者聽此斷腸聲

少年輕遠行易發同爾汝紅顏望中老離恨尚如許妾  
身異金石更涉幾寒暑長天誰云廣不見收墮雨愁來  
津頭望信絕不得渡隣婦念幽獨艇子隔溪語落日下  
空江修烟淡晴渚流恨滿春風西飛數歸羽

古意

茅簷秘秀色從古歎不遭遊子去來返徒使寸心勞朝  
嘆江海深夜視星斗高歸期約春風今已木葉凋一日

兩回來但看門前潮

臨海僧珂公出梅花詩和其韻

漫天飛雪鬪梅英未有東風便有情竹裏藏春春不覺  
水邊見月月羞明神人自惜迷姑射天女何妨伴淨名  
第一花中拈實相談禪說法大修行

剡溪月下泛舟

歲殘清夜一溪澄更愛千峰霽月升天地高低銀色界  
山川表裏玉壺冰裘單擁火宜無倦石響行舟恐不勝

休說興來并興盡茲游今古亦何曾

姜山通閣黎真骨歸塔以詩送之

空門龍象道高升坐使山川勝氣增  
天道不言成四運  
人間無處證三乘雲深尚有遊山客  
烟冷空餘禮塔僧  
一葦莫嗟成萬古幻身來往本何曾

歲杪道中

巖風號萬木天意自悲傷野店逢殘歲  
危峰半夕陽吾  
生猶道路此恨付杯觴正是淒涼極  
寒梅逗晚香



望秋

門對萬山深登臨老病侵  
牛羊隨野色草樹帶秋陰  
此景聊供望何人肯見尋  
猜鷗不用下我自信無心

病中

遙夜支頤坐春醪負十分  
碧天沉宿靄清月入微雲  
真妄怯多病翔潛喜不聞  
鞦韆人樂處十載愴離羣

寄東山覺老

紅泉碧嶂舊登臨來演真常契  
佛心漫道山林無獨往

那知笙磬有同音  
堂前明月四時好  
山外白雲千古深  
此別松門無復見  
漁樵為伴老相侵

剡溪王秀才畫子猷訪戴圖

剡溪萬壑千巖景  
人境誰能識心境  
君畫山陰雪後船  
始悟前人發清興  
眼中百里舊山川  
荒林雪月縈寒烟  
料應興盡故無盡  
賓主不見寧非禪  
當年戲留一轉語  
不意丹青能盡覩  
更畫人琴已兩忘  
妙畫子猷真賞處

雪溪觀雨

晚雨廉纖正滿空萬峰都在暝雲中風雲變態何深淺  
坐看天施水墨工

山中早秋

蒼茫山口月西沉瀟灑新秋院落陰雨滴梧桐河漢淡  
夢中猶記少年心

山居追涼

松門東路有柴關涼卧清宵夢亦閒更待海風來萬里  
一天露月滿空山

秋容

如畫羣峰縱復橫  
孤烟收盡片雲輕  
天容常帶秋容淨  
萬里碧天新雨晴

送王道元運判致政歸潛皖

好山如幽人深絕  
常避地潛峰獨呈露  
孤立信竒最高  
擁一寒峰縹緲亂  
雲氣萬古招行人  
誰與賞心會  
戎公實仙材崑閬失  
品次挽公青霞襟  
來作繡衣使  
終尋汗漫遊  
高舉九峰外  
行色開畫圖  
秋空捲新霽  
造化為我

娛神超物無累我窮知音稀與世久無味落葉掃不禁  
歲月水東逝愁作送公詩出門更何詣贈言詞亦貧無  
以報高誼野宿慎衣裘寒霜方夜墜

送和斜川詩一首

并序

歲後五日僕欲從西湖追和斜川詩是旦江子  
我居新市招張仲宗同遊後

缺

雨止亦和此

詩見寄事之脗合有若此者昔白樂天游慈恩  
寺元微之在梁州同日夢其地各賦詩相寄議

者謂相望千里而神會誠心流通無足怪者輒  
再和一篇為寄且識其異焉

採藥游名山恐是韓伯休款段下澤車久師馬少游兩  
公學真隱異世今同流遇害能鳴雁多猜不下鷗何如  
脫羈帶尋壑與經丘人生亦誤計獨醒無匹儔天地本  
虛靜萬物自應酬陰陽驅意氣定能相勝不況復漆室  
女浪為魯國憂真妄兩非是湛然一無求

山中梅花盛開戲作

化工難迴天地春，下遣天仙第一人。前驅飛雪助幽絕，  
千里隔盡埃與塵。何心百卉擅獨秀，寒入萬物無精神。  
綽約肌膚瑩香玉，借與東皇立花國。開破天地發生心，  
引出世間凡草木。品流不數廣寒宮，為嫌月姊長孀獨。  
波上輕盈掌上身，由來比並皆塵俗。須知尤物到絕言，  
從昔華詞吟不足。溪回路轉一枝斜，可惜天寒倚修竹。  
窮途游子歲華晚，腸斷夜投山館宿。古今幽怨不盡情，  
更入淒涼笛中曲。荒山偶賦梅花詩，佇立花前香在衣。

傷心不忍別紅紫付與曉風零亂飛

繫舟餘杭門訪西湖金輪寺參上人

北郭望西湖微徑幾尋尺澹與人意長雲寒正無色深  
尋幽禪居步轉蒼山側落葉不可紀遮盡山下石師方  
無定居我亦何所適四海漭無歸老矣山中客百年熟  
機緣還此共禪寂語罷今古分坐上有陳迹一笑視此  
生何事非戲劇開門納遙峰暮雨一江白茲游非世逢  
歸路晚蕭瑟積陰迷曉昏鐘聲報將夕



送孫肖之還縉雲

蓬蒿頻歲掩柴關再喜相逢一破顏  
游子年華紅葉老幽人風味白雲閒  
那知篋裏書成後猶作溪邊興盡還  
流落天涯俱避地念君更入萬重山

送郭壽翁還廬陵

共遭敵騎汝陰城十載相逢尚甲兵  
萬里鷓鴣自騫舉九關虎豹任縱橫  
雨昏山遠行人恨日暮草長幽鳥聲  
只有別離心似舊亂來難得是交情

送黃生還臨安

舊事恍如前後身  
龍門四紀更情親  
茅廬驚歎見斯客  
天馬超騰感似人  
三徑草荒殘歲雨  
一枝梅作渡江春  
莫言吳越方成別  
纔隔雲濤莫問津

再和雪聲

天上威儀世豈知  
六花寒露夜偏宜  
半空環珮朝元罷  
滿地球璣按舞時  
簌簌初隨風更急  
蕭蕭却雜霰俱遲  
房公松竹分清俗  
除却天聲總未奇

又作帝宴鈞天世  
宜知落花寒露夜

偏宜房瑄云天下之聲惟竹聲  
最清及聽松聲知竹聲更俗

南巖悟禪老見於山中同烹玉糝羹

我家峰頭最高層落葉蒼崖不可登  
清坐與師烹玉糝  
千巖風雨一深燈

即事

住依溪口破殘春身伴渡頭零落雲  
更向空山拾黃葉  
姓名那有世人聞

晚意

山空寺古紫苔侵更喜漁樵不見尋  
坐對杖陰晚蕭瑟  
風吹敗葉入廊深

與郭壽翁俱客錢塘壽翁歸吉州追餞至龍山白  
塔寺惜別悵然終日始登車而去既行旬日予得  
請廬山太平觀將歸隱浙東山中寄詩奉懷

江邊孤寺舊曾經重枉驪駒當短亭落日催人心去住  
東風回首泪飄零魂歸但覺楓林黑書就終期汗簡青  
予作名臣傳數十篇壽翁尤所稱愛歸隱我無冲斗氣相思時望少微星

兩宋名賢小集卷一百八十六

欽定四庫全書

兩宋名賢小集卷一百八十七

宋 陳思 編

元 陳世隆 補

雪溪詩集 三

王銍

縉雲縣仙都山黃帝祠宇

我渡溪水尋花村羣峰勢若萬馬奔  
酣酣春色雪初霽

靄靄野氣山猶昏  
瓊樓金闕滌地盡  
松栢半帶斤斧痕  
要還清淨掃塵俗  
一炬劫火安得焚  
行人鞠躬下馬拜  
仙都妙理吾能言  
威神可畏凜如在  
有臺今亦祠軒轅  
當年垂衣正南面  
制作取盡乾與坤  
鑿開鴻荒肇人紀  
首為區宇立本根  
風后力牧來聯翩  
神機開闢施無垠  
初傳聞道廣成子  
後乃密邦中缺君功高德大不可擬  
幾與造物分遺恩  
遥遥唐虞建炎運  
萬年天子兼神孫  
至人御世用常道  
飛升輕舉安足論  
爰作一氣生萬物

奈何已把天人分伏羲八卦畫已破女媧欲補理亦繁  
飄然獨返紫清去却斂造化歸全渾廟中仙石表今古  
屹立霄壤爭推尊昂湖可望不可見意今後世難攀援  
頂中玄宮號泥丸自然有路朝天關此身內外神氣合  
俯仰自造生死門默運四時無詭異試觀日月誰吐吞  
祇今湖邊送風雨草木吹動旗與幡飄落十丈紅菡萏  
碧溪下挿玻璃盆馬蹄車轍不須有雖迷襄野道自存  
嵩泉夜發百谷響洞庭樂聲猶可聞山川古色藏妙意



誰與開滌明根源我談希夷返淳朴不假辨說波濤翻  
明覺山中始梅花盛呈妙明老

急晷馳輪歲將歇我更荒村轉水轍凝巖萬物凍無姿  
水墨陂塘葭葦折是誰背向此間來破萼梅花伴幽絕  
遙山誰恨天作愁澹畫眉峰半明滅清香自滿不因風  
玉色素高非鬪雪竹籬凝睇一淒涼沙水澄鮮兩明潔  
天仙謫自廣寒宮定與桂娥新作別尚憐孀獨各相望  
多情與照黃昏月從來耐冷月中人一任北風吹石裂

漫勞粉鏡學粧遲，欲寫冰膚畫工拙。千古無人識歲寒，獨有廣平心似鐵。我因花意拂埃塵，尚恐人傳向城闕。

詩成火煖夜堂深，地爐細與山僧說。

皮曰休曰宋廣平鐵心石腸乃作梅

賦有徐庾風格予謂梅花高絕非廣平一等人物不足以賦詠

明師見和梅詩，再用舊韻，兼奉送還福唐。

斷輪妙手聲名歇，誰信出門猶合轍。後來世外有高禪，凜凜蘭摧并玉折。久將生死付八還，不數圖書號三絕。詩來乃與梅爭妍，獺髓補痕紅未滅。那知一夜卷東

風開盡寒枝，千點雪。漢宮婕妤體，自香月裏飛。仙長玉  
潔白頭對鏡憶，年少每到花開重。離別愛花取醉，惜夜  
闌春戀盈盈花上月。人歸吹恨落關山，恨極欲吹羌笛  
裂。何況東溪蔓草寒，學士猶啞顏。謝拙還驚詩律張，吾  
軍鏖戰愧非求。嚼鐵歸舟滿載萬珠璣，莫顯神龍藏貝  
闕。明朝詩逐暮潮還，餘意憑師筆端說。師舉東溪可上人詩句法似之

送謝景思假太常少卿奉祀温州太廟先至三衢

省覲

神遊眇邈海邊城捧詔躬祠盛此行九代衣冠漢原廟  
百年禮樂魯諸生東山世德聲名早南省仙班氣象清  
曉雨都門携錦誥路人更羨綵衣榮

八月十四日送葉子謙自會稽之遊江觀湖歸閩  
傾蓋論交意已傾斷絃重續喜君聽山川妙意藏千古  
天地神機在六經朝夕事皆翻覆手古今情寄短長亭  
濤江君往觀秋注萬頃漲溟無淺汀

夜坐

夜久燈花自吐紅  
歲華已盡尚飄蓬  
身遊百越風波外  
路入千山雨雪中  
失馬舊知無得喪  
拂龜那更問窮通  
懶將今古從頭數  
幾度邯鄲夢不同

送僧秀游海上諸山

丈室凝塵鎖寂寥  
飄然更打衲僧包  
春風正滿碧溪水  
落日偏宜紅杏梢  
身外誰非追日杖  
法中我是續絃膠  
雲山烟海雖深廣  
未抵安樓一把茅

陸左丞夫人鄭氏挽詞四首

家學開皇紀淑聲通德門內朝班早貴中壺譽尤尊聞  
說百年事扶携兩世孫從夫得文伯萬古姓名存

寒日明丹旒流塵暗綵衣那知長夜去無復逝川歸方  
士言終誤神丹事已非出門尋弔客惟有鶴雙飛

軒冕三從盛門庭五福優淒涼孝子泪悲慟故山秋楊  
子新阡啟班昭舊史留空堂對萱草無復更忘憂

貌毀藥藥棘傷心蓼蓼我斷機慈訓在懷橘孝思多露  
草寒沾泪雲山翠涌波悲風感行路楚挽不成歌

同賦梅花十二題

半開

一枝開破一年春  
鬪藥稠花總後塵  
却恨無媒憐獨夜  
月偷清影向何人

清晨

曉色宜春露藥鮮  
玉人斜插鬪清妍  
新花更映新粧面  
無限風光在鬢邊

風前

清香自滿不因風花氣迷人處處同祇與吹開又吹落  
春愁已在笛聲中

月下

樽前舊厭繁多態雪裏曾嫌淡少情何似天容開夜  
色數枝寒玉轉輕盈

雪後

枝留清雪色難分似向殘粧試粉痕恨滿前村花落處  
萬重烟靄遠連雲



雨中

水泛殘香不可尋  
更堪烟雨鎖花心  
祇知賜浴恩波重  
未識和戎怨泪深

水邊

雪後濃濃嫩水通  
滿枝烟雨暗春風  
試看照影橫斜處  
渾似靚粧清鏡中

竹外

枝上淡烟籠白雪  
此君高節助清真  
要知謝女姿容別

林下孤標迴出塵

江村

竹籬茅屋江郊路未肯關  
粧城市間小舸飄零水風晚  
又隨殘月落關山

山館

窮途游子年華晚折贈無人  
信手題留戀清香忍回首  
五更立馬斷橋西

薄暮

寒欺雪勒未逢春  
照影今宵借月魂  
可惜孤山吟已盡  
後來幽絕幾黃昏

欲謝

零落斜枝雪未乾  
且垂薄幕護春寒  
大都榮悴人情別  
我為殘英特倚欄

游東陽涵碧亭劉夢得所賦詩也明日過中興寺  
游覽終日記所見

我游東陽城  
隱侯昔所治  
山川無古今  
城邑有存廢  
夢

寐涵碧亭草間得遺記飛流落天明噴灑寒玉碎停車  
風雪中豈特生秋意李杜到韓劉崢嶸相品次景因真  
賞見遺句細吟味假蓋上前峰提携有兒稚明朝春開  
晴步到中興寺山僧引客游佳處相指示羣峰四抱圍  
浮烟生暖翠唐年故刺史宅作布金地報以遺姓存猶  
盛邑中厲唐刺史厲日新捨宅為禪寺今邑中有後嗣存焉寶月生旁邑應真  
傳絕藝我我畫三佛張吳意態儷氣象隨世低病鶻無  
猛鷲碑陰筆縱橫才翁雄近世疑是蘇耽鶴去家已千

歲懷土一來歸故盡華表字

寺有贊休畫三大佛及蘇才翁記墨

上方有

重閣景與衆山會一酌瓊瓌泉碧色劍鉞泮小叢相思

樹紅藥朶丹荔僧言此芳根草木獨靈異上枝花盡開

下實方委墜開落俟相見終始周一歲不同桃與李華

實若相避愧師論應實未辨該實際山寒足力疲蕙帳

聊假寐交錯拂衣巾紅綠映裙袂雖非維摩室天女亦

遊戲起濯古銅壺凜凜存往製滌手焚妙香刺與洗塵

滓歌枕聽松風為我勤解穢幽尋欲黃昏小圃春物麗

落日在前峰，駘蕩東君醉。宮娥失翠鈿，搖蕩誰復制。風起落花多，翩然如墜珥。植杖久裴回，羈旅得少慰。恨無昔人語，剖析發幽秘。明朝漫回首，長塗方聳轡。綿綿芳草多天涯，亂愁思。

賦得隔樹見秋燈

隔樹見秋燈，青熒更可愛。半籠宜葉疎，微透嫌枝礙。深誤暗蟲投，靜窺棲羽在。望疑簾中暮，吟惜欄干外。月到冷光幽，風來孤影碎。山客遙夜歸，耿耿如相待。

舟行扶病訪王文孺曜菴且蒙賜佳章次韻為別

西風過雨冷孤雲客路衰骸與病親烟渚好橫今夜笛

雲林還憶舊時人凌空舟樂傳巖客

近有游客蓋呂公也遺文孺長句及

神丹照水紅蓮賦洛神老泪數行傷別蓋自憐無可更露

巾

九月二十七日與客游龍山

野服芒屨步步同天寒猶薄客情濃身如萍水同千里  
路入烟蘿更幾重滄海清江共今古黃花寒葉雜秋冬

暝雲自與千峰合送我歸鞍寺寺鐘

雪作望剡溪

玉樓瓊樹曉烟披擁衲開門四望迷清曠世人誰似我  
雪中更到子猷溪

雜興效阮步兵

松巔負殘雪高映寒日暉衝風忽飄墜勢若從天飛庭  
虛四散入凌亂侵人衣衣重不忍拂恐與清景違援琴  
弄太古聲淡節亦稀衆笑已獨賞恍然迷自非乃知絕



絃意千載同依依

倚樓曲

天邊皎月凝清光  
圓缺不如人意長  
夜來嫦娥和月落  
清曉鏡裏看新粧  
此情同生復同死  
君似攔干要堪倚  
高樓風送管絃聲  
腸斷五陵年少子

書謝文靖東山圖

謝文靖東山圖今會稽東小江之上有東山存  
焉絕頂下臨江海蓋萬里雲境也僕觀文靖初

渡淞江樂會稽佳山水與王右軍許詢支遁孫  
綽季充游則東山在會稽是矣僕嘗宿其上題  
詩僧壁云山晴山雨古今恨潮落潮生朝暮情  
我識前人舊時意寒巖一夜聽江聲今觀斯圖  
併書之為一笑之地耳紹興十二年二月丁卯書

山如出鬚眉溪似縈風帶雅意樂溪山安用携粉黛烟  
雲無定姿姝麗有真態謝公經世心遇物何顯晦鐘鼎  
與山林生處初一槩均分四海間如我常安泰臨難無

喜懼與人共憂愛百年但影徂十載猶心在風流不可  
追超然八荒外

次韻率行之見投因以賦別

素空零玉露碧梧墮金井周年不待人去我如斷梗歸  
翼懶飛翔老驥倦馳騁山空風月滿人戀松桂影窮方  
屢厄陳喜動初入郢文豪獲勝游羈思發深省周原富  
十箱漢儀重九鼎王謝樂江海巢由本箕頴談深光明  
藏游遍妙峰頂頌橘悲屈平賦梅思宋璟炎涼梁上燕

喜怒坎中龜十年六龍轡

此謂日  
轡也

萬事一魚艇居人望

歸騎暝色暗前嶺淺學字識丁美穴魚知丙書隨新雁  
行慰心常炯炯

寒夜

淡月新霜似舊時更憐杖興夜遲遲夢回一枕淒涼恨  
帳外青燈不得知

蒙蔡藏用惠古風一軸歎仰不足輒賦病桐詩為  
謝感深而詞衷耳

老境憂患集坐受衰病侵山林成獨往樽酒惟孤斟萬  
事信已矣滅跡棲松岑對鏡未免愁寒雲生嶽陰斯時瓊  
瑤贈無以報兼金酬之病桐詩嘆息成永吟風霜入枯  
枿螻蟻穿病心艷艷上林樹已朽難寄林幽人識爨下  
取作綠綺琴拂拭延妙聲泠泠朱絲絕淳風散已久世  
為多注淫一弄清風還三古盡可尋自然俯仰中山水  
見高深同心齊取捨何嘆異古今永言遇真賞山海有  
知音

除夜

一歲盡今夕既往那可追  
疎梅吐幽艷輕冰釋寒澌  
新陳自相代長作萬古悲  
亦復強取醉椒盤雜兒嬉  
天回萬物春除盡羣陰卑  
地除衆枯槁從今作華滋  
一除不可復綠髮成鬢絲  
此是有盡處那知無盡時  
凡所未除者所愿皆除之  
晚景安分守幻身絕思維  
生死我所明聖賢我所師  
優游觀變物翼戢仍鮮差  
山嶽惟塵爾寸心不可移  
浩歌坐達曉自信何用疑  
樓頭畫角聲已逐

東風吹

寄和邢子肩孫肩之始春見寄

東風初到亂山頭  
無數殘梅雨未收  
何待傷春對晴景  
暝雲橫盡古今愁

海山雪後海天寬  
羣玉參差萬里寒  
巖谷無人共清夜  
倚欄獨向月中看

山林老去萬緣休  
只有情鍾舊輩流  
芳草無窮山四向  
斷腸人在最高樓

元日雪

布和舊重王正月嘉祥元日初逢雪飄入椒觴氣更蘇  
積滿玉蒲水已怯歲歷今纔第一行三百六十完未缺  
故使重窺混沌時太素山川始融結但聞南陌流懽聲  
懶將西佛論初劫九門想得十官期高聳岩堯白銀闕  
事隱東林夜宿年靜酒僧窓更幽絕草堂人去空舊賞  
夢入江山半明滅祇今縱橫天上來勢壓丘陵動溟渤  
映山更倚百尺樓始見天工盛施設

樸嘗謂雪宜映泰山高樓自上觀之



明日東風掃玉塵  
輪與寒梅亂花發  
壯觀新年意氣張  
天巧空竒吾語拙

送嘉魚周尉

大門志與古人謀  
萬卷詩書第一流  
文采聲華今有繼  
死生契濶獨相求  
天回涼色偏宜月  
地近潮聲先帶秋  
此別頻書訪存沒  
老人曾見綵衣游

送無相祖老真骨歸瑤

去來一念等孤雲  
雙履西歸道更尊  
落葉滿山新塢就

雨花盈几故經存  
風流罷放林間鶴  
月冷空啼嶺上猿  
白髮未為生死別  
寒溪猶繞雋松門

寄南巖悟禪師

雪後千峰玉剎成  
瓊瑤寒照寺樓明  
遙知禪老閒窓坐  
指點烟村看晚晴

憶廬阜寄機上人

憶在東林學後禪  
月中清響聽風泉  
不須更作廬山夢  
魚鳥相忘二十年

上方

松間清月佛前燈  
庵在孤峰更上層  
犬吠一聲秋意靜  
敲門時有夜歸僧

向伯恭薌林詩

楚人喻香草可佩復可食  
靈均楚同姓放逐去其國  
皎忠良心惕惕懼讒賊  
偏舟下滄浪魂迷招不得  
至今芳洲上寂寞少春色  
我公異於是聲譽超八極  
挽公青霞裾接武紫鸞翼  
真契慕湘纍論心不論迹  
我是衆薌

林澡身而浴德同心等崇蘭直節逾蒼柏登善味芝朮  
去惡鋤荆棘荀令十里香揚雄一區宅君臣相唯諾品  
題來藻飾日光萬丈長衆薌馥芳澤況了大因緣功名  
皆戲劇手擎妙喜國心湛水精域諸天衆薌雲旃檀雅  
蒼菊登門三十年歲晚仍作客誦公薌林詩心境為澄  
澈雖非歌商頌聲亦出金石

會稽楊梅雄天下其佳者皆出項里相傳項羽鄉  
里也驗圖志信然戲作楊梅詩供作者一笑耳

越山楊梅最珍美人傑地靈生項里江東廟食憶至今  
應緣似舜重瞳子南方炎威無時窮落在故鄉草木中  
請看枝頭萬點火猶是咸陽三月紅摧剛作柔隨物轉  
婦人之仁仍可見風姿和味說難名顏色與香收易變  
炎炎夏日簾影垂沾污玉筍明瓠犀映出越女天下白  
壓例驪山生荔枝金鼎奪胎尤出類萬人口腹非其對  
外丹須要內丹成任君對樹連園買

雪晴閒渡西溪

雪後孤村一段烟晴光遠射玉山川酒旗隔岼招間客  
猶上西溪渡口船

送郭上人遊九巖

殘菊孤花留暮秋勞師問路亂山頭九巖只望孤雲去  
舒卷和雲得自由

泉聲

娟娟山月半巖明樓殿霜重夜氣清誰把玉琴來寫取  
松風吹斷夜泉聲

詩送韓簡伯學官於臨浦呈勸其重修西子祠

昔遊臨浦春正濃  
小江縈委如無窮  
花浮千林錦繡幄  
舟颺萬頃玻璃風  
西施故鄉擅佳麗  
會稽秀氣藏華穠  
是時山晴見真色  
落日西南千萬峰  
今情不盡古情在  
恨疊晚粧眉暈重  
恨應但知傾國貌  
無人能說亡吳功  
倘非絕態蕩君意  
姑蘓臺下猶歌鐘  
功成未甘歸范蠡  
素衣故國寧相從

韓嘗作文辨無范蠡携西子事

文公之孫重瑞世衮

繡門戶推八龍  
官閒援毫來弔古  
溪山頓為開愁容  
謫

仙亦賦綉紗石至今翠綃不停織浴池邀伴下瑤池露

汚越女天下白

山頂有西子浴池

風流昭洗待名流有德於人

當血食紅心草莖舊金釵黃陵廟成新石刻露裙瓊佩  
無消息怨鬼淒魂招不得一杯流水奠江蘿芋羅山前  
已秋色

上巳日送韓簡伯

門戶荀陳士論僉却隨王謝老江南一官傲世妨才命  
萬事承家任苦甘漁艇我將還舊隱僧窓誰與對清談



落花風雨西陵渡佳節可憐三月三

登育王所示現塔贈卿璉與三上人

危岫戴寶塔亭亭起虛空金鐸韻廣樂日夜鏘天風氣  
清逼雲漢興逸追鸞鴻嘉有三禪子超曠棲禪宮相追  
不憚遠幽致惟我同興盡歸一默人逐歸雲東平軒架  
絕壑上與絕頂通滄溟忽破碎百川競朝宗斜陽無遠  
近山亂高低紅四表倏明晦變化安可窮夜深風雨來  
陰氣誇驕雄響劇百谷咽靜夜一氣融明發石路乾清

韻生寒松

茗溪僧妙詢於其所居淨域開小軒十笏間靜求  
為永名僕以陶靖節乘流遇坎之語榜曰乘遇亦  
足以觸所遇而安不然雖無名可矣

一性本為真返為羣物迷境淨皆徑山心清即茗溪啟  
扉迴臨湖湖寬覺天低花木春艷艷松竹涼淒淒憑欄  
快神襟永與塵事睽歸船動菰蒲興斷殘霞西浮烟暝  
自起待得衆羽棲貯空諸佛心妙理何端倪乘流與遇

坎萬有皆筌蹄聊陳淵明意  
芥藻繁幽題豈有明月珠  
祇照濁水泥期我老中林滅  
跡為團畦况得大開士賦  
詠自攀躋禪深有根源句  
圓無角圭乃知文字工自與  
造化齊

次韻梅花

廣寒宮裏自無倫不祇塵中第一人  
絕態乍辭天上舊  
清香更占世間新  
烟愁月恨迎回臘日煖風遲俗却春  
且對流年覓新意橫斜踈影句皆春



兩宋名賢小集卷一百八十七

欽定四庫全書

集部

兩宋名賢小集卷一百八十六至  
九十

詳校官中書臣閔思毅

助教臣常循覆勛

總校官編修臣王燕緒

校對官編修臣吳省蘭

謄錄監生臣葛瀛三

欽定四庫全書

兩宋名賢小集卷一百八十八

宋 陳 思 編

元 陳 世 隆 補

捫膝稿

喻汝礪字迪孺蜀之仁壽人第進士靖康中官祠部員外郎金人議立偽楚汝礪不為屈遂歸隱於邛山之陽自號捫膝先生有捫膝橐

遊海雲山

渺渺天宇初便復有此山清晨及茲遊遐想百代前來  
者幾何人當時各為歡淑質揚妙舞哀絲遞清彈樂事  
坐如昨芳歲已屢殫向來所遊人落葉不復還迴然散  
遠目感之為長嘆竹林遙舊所鵲巢豈昔眠念誰常久  
存而不任所緣破涕聊一怡山川却萋妍未知後世事  
誰復當來旋

過府學遂謁文翁堂



綠荻負幽隱高槐泛輕涼各誇一時好披風互低昂詎  
知五月中微陰忽催黃我行魯侯宮獨謁文翁堂若人  
骨已朽道在斯不忘遂令蜀文章照耀日月旁世事俱  
腐矣斯文真久長靡顏能幾時蕭條翳墟荒富貴豈不  
好千載同一場三嘆過泮宮撫已涕自滂

清晚坐四天王院

杳杳天宇涼月墜星亦稀朝暉下檐隙遠色開林扉寂  
坐無物後隱几或在斯曠焉耳目清擬覺形神歸溷世

跡若近抱沖心獨微故殿經幾年何人所摹規當時亦  
媿媿作者良已罷快意取一好於身亮何私不知壯觀  
地徒使來者悲坐頃又成昔安知今是非

登正法宮塔

踈雨洗空濶高標挿青冥携筇一來登長嘯謝所櫻清  
香翔遠江丹氣舒翠岷雪巔浮夏白澗雲亦遠青孤花  
裊危芳初篔羅新榮手容五十里颺香為我陳陵坻淋  
變遷物狀幾屈信念往思自遠感來意彌臻傷哉千里

心嗟爾百代人胡為軫其德戚戚勞所營吾請以此辭  
歸來巖下畊

遊西臺院暑雪軒觀石鏡

城中苦伊鬱茲軒獨高騫連費動參差錯畦橫阡眠雪  
嶠正孤峙若與我周旋遠翠浮蕩漾輕鷗下聯軒密竹  
翳幽逕新蒲澹清漣初遊愜餘懷既久幽念攢慨彼泉  
下人灼灼夸令顏忽然墜榛莽窈窕不可援一鏡空復  
情況乃塊石頑哀哉彼愚子婉孌情所牽差勝茂陵公

更咏方士言

遊巖真觀支機石而壁有記古鼎丹茅事

古木共幽意長廊亦晏如  
於焉詠逍遙且復散衣裾  
塵慮颺已空道心頗闕舒  
不知度世人去此歲幾徂  
云何有丹砂尚爾留庭隅  
支機亦悠哉誰復訂有無  
我知此公意慨彼元鼎初  
繼之五鳳間斯民斃刀鋸  
聊欲謝世網歛以道自娛  
抱獨理自會曠懷遺所拘  
初匪逃世人而世自我疎  
含默念斯人起我憂患餘

謁諸葛廟

孤雲何其高明月不可繫灼灼抱此心與世自涇渭適  
來從所歡感亂亦歔歎咨惟今之人竊國未云耻匕首  
入吳市秋風動燕水區區素與曹等是刺客耳而我於  
其間秉義不敢墜哀音回衝颺清義動幽邃天心固難  
亮吾獨信所履溶溶日間雲漠漠苔點砌飢飈墜蒼瓦  
澹薄公所憩靜然相英姿孤懷亦差慰

謁江瀆廟

坤軸東南傾大江日夜注前驅下荆巫餘濤略吳楚任  
勢不期勞得意緣所遇水也初無營神哉亮誰主芳蘭  
沉清華碧草舒翠縷晨鵠戲野岸春鳧集深渚均是得  
所安而神豈私汝古來幾精魂捨此迷所處淫遊不知  
還沙村失煙樹而我後千載悠然在江滸抱耆貴無競  
矜名忌多取冥冥卷岼風淫淫打船雨舞雪窺洪濤開  
蘋渡前浦再拜謝神貺聊復隨所住

子雲墨池

讀書豈不好憂憤還自茲書中見古人隱閔惻餘思遇  
險理有激尋分意多隨娟娟感姱容感感念幽棲曾是  
無間然孰馬愜所宜覽之不自聊悵然起遙悲不如撥  
置之濁酒聊一持先王頗多事斯心昧前知亦復坐奇  
字慘然亡所歸

晚泛浣花遂宿草堂

扣撓泛澄虛濯流睇幽芳晚霏襯奇樹夕霏媚踈篁歸  
鳥亦暫閒夜魄動初涼忽焉衆星微天高月舒光昔也

杜陵子澹然此茅堂客至酒自斟句得意已忘云何常  
念飢零落在道旁古來技入神一飯豈所望吾輩天所  
窮慨歌淚霑裳

遊琴臺

臯朔語類俳上頗倡優之嚴吾數預事慘凜失所棲眷  
言彼妹子深情結幽期浩露泛酒甕輕雲思琴徽撫絃  
視八荒頗覺秦岫低紛紛漢諸子悟解良獨遲一朝不  
自保頸血霑裳衣公豈不炯戒慮禍蓋已微汚已迴前



識達生邁天倪濶哉昭曠情豈屑後代嗤

草堂詩

燦燦詩翁錦里西只緣詩好遂窮棲竹鋪冷色雲連寺  
柳漾晴絲鳥過溪凝怨不禁闌樹暗駐情應恨蜀山低  
離人苦怕春歸盡可忍紅英半著泥

閒把煙光次第陳岷峨風物見精神翻成錦繡千般樣  
供與江山幾處春深屋長河元老大蛾眉曼睞却逡巡  
從公乞取無邊手免作詩中半箇人

從教日日敞憲扉  
嫌怕風光入眼遲  
剩買芒鞋供看竹  
趁乘春雨去栽檜  
苦無賓客僧來後  
薄有生涯鶴下時  
聞道鄰翁酒初熟  
新篔一酌莫相遺

遠嶼曲洲縱復橫  
沙邊繁鳥弄簫笙  
一軒檐冷松陰合  
十里林香藥草生  
路轉斷楂逢石坐  
風移深一作竹見

僧行晚來冲抱更  
清曠時有幽人帶月明

亂後飄零歇此身  
風光無賴更清新  
客懷易感酒添病  
詩思苦慳花減春  
南枝北枝鶯舌巧  
前村後村雨脚勻

暫借溪邊老為客  
花心柳眼莫撩人

朝元閣邊瑤草芳  
惟君之故遙相望  
人歸後雁關塞阻  
思入南鳧離夢長  
懸知同心兩相憶  
剩欲共看千里光  
金輿玉輦不復見  
腸斷華清雲樹蒼

竹外清疎侵碧溪  
谿邊竹澹煙雨霏  
閒看雪嶺題詩罷  
醉散西郊信馬歸  
霄漢直愁雙闕迴  
夢魂長著五陵飛  
故園秀木又春色  
只恐歸去池臺非

錦宮城西春草芳  
杜陵客子憂思長  
浴晴晚樹淡浮綠

卧水幽花深度香交情憫憫言燕阻舊國迤迤雲山蒼  
白蘋洲渚落日晚明邊正銜歸鴈行

浣花四月天氣和綵舟翠旂樂莫過離人千里起遙怨  
緩棹一曲浮靈波惠風曇曇泛蘅杜流雲演演逾關河  
終然有懷春復夏歸去灞灘眠汀莎

題周昉美人拜月圖

東風原自無消息獨捲珠簾望春色風驚紅葉墮珊珊  
夢斷行雲泣殘月挹挹柔情不自持此心端被月先知

窺窻入戶如相伴應是嬌娥慣別離

欽定四庫全書

兩宋名賢小集  
卷一百八十八

兩宋名賢小集卷一百八十八

欽定四庫全書

兩宋名賢小集卷一百八十九

宋 陳思 編

元 陳世隆 補

竹谿集

李彌遜字似之蘓州吳縣人登大觀二年進士第調  
單州司戶政和間累官起居郎以封事劄切貶知廬  
山縣改奉嵩山祠靖康元年召為衛尉少卿紹興七年

遷起居郎自貶後二十餘年復居是職直前論事鯁切  
如初時秦檜秉政主和議彌遜力爭之因是落職退  
居十餘年紹興二十三年卒高宗詔復敷文閣待制  
有竹谿詩集十卷

自毗陵與兄弟避地南來約為連江之歸中余各  
以事留遂成獨往念茲離亂易於隔絕作詩

兵塵暗中原大駕巡江都春風遂南渡百辟咸奔趨衣  
冠困陵暴川陸紛舟輿微生本萍寄寧復安吾廬寒裳



犯深險顛仆妻與孥懷恩痛未報無路先貔羆岩穴多  
遺賢天網固亦疏驂騑懼捐棄未數十駕駕銜悲望君  
門忍作永訣圖扁舟兄及弟去指東海隅夜榜亞修舳  
曉帆趨橫蒲如何忽參商行止分半途怡怡風月夕來  
若同隊魚慘慘霜露秋去如獨翔鳧歲晏道路長雙影  
誰與俱但憂赤眉間能致黃耳無青燈攪寒夢起坐中  
腸枯載歌鶴鷄詩引淚零襟裾

同天隱少章遊高山懷元明

欽定四庫全書

西華名賢小集  
卷一百八十九

秦公我輩士早踏翰墨場萬言若投石十年猶枯蘖苦  
欲泛江海有親在高堂牢落京華春門無一壺漿長鞭  
策瘦馬送我古道旁憐我值險艱赤心寫推傷鏗五  
字句勢與鵬鵬翔感此坐矯首星星鬢成蒼西風小搖  
落雨洗烟嵐光嶂曉露孤秀野陰棲暗芳更携鮑謝流  
履盡千岩霜搜竒得幽深訪古到淼茫月落潭影空清  
吟殊未央緬懷紫芝宇百憂繞迴腸三嘆已晡食十起  
中夜牀雲埋長安日魂夢不敢驤茂苑富山水結廬余

所嘗我欲放船下卜鄰俯滄浪耦耕種林田共掃三徑  
荒頭白青山裏長歌樂歲觴

承天寺

宿雨洗蒼骨峰巒發新秀尋躡竒蹤騰踏衆山圓層  
林鎖巖隈突兀見危構空高望浮圖靜勝逼靈鷲我來  
風雨秋白露欲昏晝但聞百川赴鳴玉瀉寒竇岳亦闕  
嶮峨路絕不得邁攀緣仰脇息坐石俯長溜帶露摘山  
芎披榛覓仙耐山光晚逾清雲壑若相授終期爛漫遊

陽鳥欲回喙更約十日留之子緩蹄轉

法王東菴

吾宗丘壑資耿耿抱幽獨結構祇洹家縈迴轉岩腹前  
川布黃金合嶂來蒼玉步出覺華天乘凌眩生日雲間  
起層林林際懸高屋斷砌滴踈泉微蹤隱深木堂空貝  
葉昏苔盛半堦綠朱幡久不來哀猿响秋谷

五松寺

秋風吹客衣去路倚天碧躋攀一何苦正坐愛山癖人

言五松下曾是瞿曇宅至今梧竹陰列屋棲禪寂塵纓  
得暫解俗駕聊可息怡顏岩間樹洗耳泉上石孤雲共  
往還窈窕去無跡道人榮忍流獨步少林席客來了不  
言碧眼照庭柏希聲出鐘梵妙意生牆壁寒灰暗青燈  
偶坐遂終夕歸來人境空缺月挂山額

次韻仲輔山中之作

崖陰坐清暝目為山光注妙意不可名悠然與心晤疎  
泉石中鳴落葉衣上住冷風起虛籟還向無中去三生

聽鐘魚偶共來時步佛屋倚秋風團團兩桂樹却疑此  
境中曾是經行處

碧霄泉

山根出清泉云自九天落風潮帶江腥天黑魚龍泊何  
當寸雲敷一洒徧寥廓滄浪勿復歌吾纓久已濯

秋居雜咏

青春背我去白日不我謀霜飈驚草木寒威戒衣裘寓  
形復幾時四序忽一周世路復劍戟中懷孕螟蟲營營

事長久頽齡如置郵丘園倘未卜怡悅心自休

窮秋雜花遠眷此霜下傑明金委瓊瓔寶璐綴環玦依依  
風遞蘭皓皓日穿雪若無天冶姿不受衆目悅銜觴泛  
其英攬之腸為結誰能踵高門持以浣中熱

公園十畝餘日涉亦成趣浮陰未全收晴沙已勝步杖  
藜相與行童稚雜冠履枯魚泳微瀾悴菊飲晞露欣物  
各有時撫懷偶軒慮安得三徑餘誅茆種瓜芋

晞陽軒

山高竹柏陰得之近亭午茲軒揖朝曦精色快先覩濛濛  
勒花春十日九風雨羲和為返旆照我衣上縷眩  
然九陽遊誰云在環堵

次韻明甫西園之什

莫作原上紅寧為徑中綠多花必早凋依依不如竹一  
枝寄他林翛然傲華屋填飢飯秋英借健膏石斛坐斷  
百懶身無心問雞足

暇日約諸友生飯于石泉以講居貧之策樞密富



丈欣然肯顧賓至者七人次方得順和貧士韻人  
賦一章

崔嵬孔明柏結陰衆所依移根天衢上曾撫日月暉如  
何去大廈却繞烏鵲飛終當煩萬牛挽取廊廟歸鄭公  
澤既遠何以慰調飢公其踵前修一洗貧士悲

歲戊戌秋舟行宿泗間有持小石售於市者取  
而視之其大可置掌握峯巒鬱然若巖竇澗  
壑水落月吐雲影森冥若近若遠皆有自然之

欽定四庫全書

兩宋名賢小集  
卷一百八十九

勢乃有千錢購之而為之名曰羣玉峰曰水石  
曰遙岑曰碧澗置諸座隅卧與之對且余少時  
南遊匡廬升紫霄以瞰九江東沿洙泗登泰山  
而徜徉大伾道鄴歷趙及燕而還今年責官羅  
城當走蜀問山於蜀人馮濟川每至佳處耳傾  
心受恨不能一日千里也繼改命不得往遂自  
鄭適洛以窮隋洧兩河之源歷覽二室之趣方  
將踰淮浮江自放於世猶念深山大澤不能與

有足者皆至偶於圖畫對之未嘗不慨然興懷  
今一旦得是數山坐眺四方之勝豈不幸歟吾  
將寓形其間而與之俯仰上下不知我之在丘  
壑丘壑之在我也好事者將以余為過耶姑從  
而為之辭

羣玉峯

五城十二樓高下聳寒玉天空開翠微不受塵土觸半  
生嗟環轅萬事驚轉轂寄語山中人為占一峰綠

欽定四庫全書

四庫全書  
卷一百八十九

水月巖

明泉落岩隈，滿月挂山額。  
踈星淡河漢，下水光白了。  
然心境空炯，炯照真宅。  
鴻鳴夜更清，欲卧已終夕。

遥岑

宿雨洗空濶，出此方寸岑。  
聯綿翠光浮，妙巧不可尋。  
飛雲去未返，慰我千里心。  
誰為具徽絃，有酒聊自斟。

碧澗

蒼崖高鬱盤，下有千仞傾。  
當時捐珮侶，寄此瑋琮聲。  
坐

石風露晚心與秋月明滄浪若可濯母負冠上纓

宿揚州城外

舟行繞城郭缺月疎林杪窈窕一溪深微茫衆星小忘  
言對詩書適意親魚鳥幸此絕紛華行歌閱昏曉

和少章喜晴

日暮馬行疾峯巒過眼頻雨堦長苦夜晴谷若逢春風  
月起歸恨江天思故人機心渾已盡惟有白頭新

發光林寺

欽定四庫全書

兩水石閣小集  
卷一百八十九

朝發光林寺崎嶇渡復攀  
摳衣綠翠隰側足下蒼頑  
急雨欲平澗斷雲時見山  
祇應超勝地行路不知艱

久雨阻遊昭亭

浪迹隨方寄窮途觸事諳  
雨逢春甲子江滿地東南  
容鬢霜前落詩情酒外酣  
上方愁獨往藜杖許同參

琴溪

竹色千畦靜溪光一鑑開  
巖隈宿風雨人迹老莓苔  
控鯉定何在騎鯨今不來  
空餘泉上月與我共徘徊

春日雜咏

春到陵陽市人家泊翠微  
南烹甘入筯北戶暖生衣  
花暗昭亭寺魚肥句水磯  
樂遊須結社倒著接羅歸

幽棲足春事晴日苦相催  
履齒穿沙穩筇鬚碍竹回  
光風初轉蕙殘雪欲欺梅  
自是經過少柴門日日開

役役炎涼態悠悠道路賒  
情懷知老大夢幻閱紛華  
攬思雲邊樹供愁雨外花生  
涯書一束到處即為家

二月忽已破一春強半過  
提壺工喚客布穀巧當歌  
得

欽定四庫全書

兩宋名賢詩集  
卷一百八十九

酒先愁盡惜花翻恨多  
逢辰不為樂明日復如何

早入昭亭與同遊散步山中自樵徑至水濱路窮

還僧舍飯

散策春岡曉樵蘇一徑長  
鉤衣藤挂石斷路水浮塘  
山靜竹生韻池清蘭自香  
禪房得深憩魚鼓正鳴廊

再遊龍潭

密霧開深徑幽竒得再行  
水光沉樹色人語亂泉聲  
仙去山客寂龍遊雨陣輕  
誰能築雲室千古共淒情



池亭待月

輕雷不成雨，風砌旋楮牀。  
山亂雲行曲，樓高月路長。  
柴門非故國，戎馬尚他鄉。  
笳鼓悲清暝，關河思不忘。

散策

散策北岡路，牛羊歸徑深。  
水窮人小立，山靜客微吟。  
點稻花雨團團，榕葉陰田翁罷爭席。  
明日共幽尋。

次韻曾德明司理留題西山兼柬蘇宰

層軒無碍石，支徑曲穿林。  
竹密催山暮，松搖亂客吟。  
琴

書虛室冷鐘鼓淨坊深誰謂溪波遠能來杜與岑

夏日與妙現老堂二公晚步江皋露坐月下夜分

乃歸

胡牀興不淺未肯庾公賢山意知秋近江聲到寺前夜  
涼新雨後月色正愁邊可惜江南夢青燈照不眠

贈別竹西王彥升居士

參軍四壁生秋草鬢毛不似心已老終隨烟霞學巢由  
一室安能事除掃竹西舊說青雲客詩思長留意無極

塵埃不見襄陽山，  
穎有斯人吐消息。  
赤心照日青眼明，  
與君一見輸生平。  
君去摩天學孤鳳，  
我今飲海盤長鯨。  
雲車馳兮風馬休，  
呼兒乞取千金裘。  
明朝有句道不得，  
黃葉滿庭無恨秋。

行路難

江心蟠石蒼虬立，  
山激江流浪頭急。  
風昏月暗魚龍愁，  
電掣雲奔鬼神入。  
船頭星斗天為低，  
夜潮生寒洲渚移。  
鳴舷鼓柁驚楚子，  
危檣遠纜號吳兒。  
篙師咄咄自相語，

明朝扁舟繫何許半月江行十日風寸步家山隔秦楚  
黃衫年少金雕鞍日高華屋春夢殘插花走馬咸陽道  
世上空嗟行路難

歲後三日與羅叔共二邵似表弟席上分梅花年  
後多韻得多字

春風一夜如鳴鼉殘香暗粉驚辭柯新春三日駒隙過  
花前百罰寧辭多男兒莫遣兩鬢皤舉觴不飲理則那  
酒酣不用吳姬歌短鬚尚足供吟哦坐中鮑謝偕陰何

語如韶濩參鳴珂鏗鏘入耳痊沉疴豈獨使我衰顏醜  
我今官閒得婆娑遲明更上梅花坡

虞仲通判以溪聲名軒約同賦

山根出泉瀉鳴玉上有蒼崖擎佛屋無風水石自撞觸  
不盡潮音發寒谷宰官豈是雲間陸舊識南泉生處熟  
當軒大榜與名目平地重翻偃溪曲曲中時轉三妙語  
一一聲音談佛祖喧唳噫視十方鼓萬壑風雷送烟雨  
此聲不屬閒中取六鑿相攘竟誰主後來紛紛何足數

欽定四庫全書

兩宋名賢小集  
卷一百八十九

十二

五乳峯頭曾賺舉山翁有耳百不聞團蒲曲几窮朝  
昏何時沿溪掬寒綠掃葉煎茶睡初足

客誦故人劉立道梅花詩有懷用其韻以寄之

桑柘如錢柳如雪南村北村欲早月老翁飯飽摩腹行  
白鷗自隨閒喚喚鐵攀花正恨顏色乾哦公七言毛骨寒  
惜花不似愛詩苦即遣愁海回狂瀾公今為郎尚黑髮  
仕路不應嗟歇滅江國官閒來雁多莫使故人書斷絕  
春風步馬芳蘭臯思君哀鴻獨求曹幾時懷抱相對盡

桂漿酌斗供詩豪

遊龍潭

秦山破碎天上來  
女媧仙去空崔嵬  
中懸鳴玉二千尺  
下有百仞青銅開  
羣龍變化出嘘吸  
雨暗雲昏鬼神入  
我來坐石秋水間  
雲影扶疎落空濕  
浮丘容城不可俟  
摩挲青壁著名字  
兩翁下遊會有時  
訪我鍾陸五松寺

次韻碩夫池亭賞蓮

胡牀麈尾揮長柄  
風和入座花容靚  
乍開還合晚照中

修竹佳人倚春暝此間此景樂最深世路好惡君酌斟  
下車何必笑馮婦投杼未免疑曾參江山信美來者稀  
淵明獨與漁父違誰云寧食艾三斗不如杯行莫停手  
黎道人自長沙入閩邂逅見之論易頗有所得自  
言居醴陵山中有田廬食魚種竹可以卒歲作  
取足庵義方室優游其間藏書教子甚樂也遽還  
求詩贈之

兩脚不踏咸陽塵兩眼不逐瀟湘春胸中乾坤照萬古



奇偶縱橫何足數閉門有竹食有魚遺子有田家有  
書一生可了心自足世上紛紛漫榮辱

山行遇雨

滄溟四乾青虬立碧雲摩霄高喋吸六丁夜挽天河傾  
石骨無塵露蒼濕長風吹雨不成絲飛鞚衝山帶烟入  
羲和回馭還青冥布穀催耕喚春急

獨宿昭亭山寺

山寒六月飛霜雪樓殿夜深鐘鼓歇琅玕無風萬戟閒

屋角明河挂天闕龍牙七尺玉壺冰炯炯神清夢不成  
可憐幽絕無人共卧看雲頭璧月生

與公序避暑石盞方晝欲寢聞林間禽鳴甚樂因

得小詩云

一林啼鳥不知名應怪山翁此地行化蝶與莊俱是夢  
游魚知我久忘情胸中丘壑真餘事世上功名畏後生  
但得盈樽供自酌何妨人境卧淵明

春近風日漸佳與似表弟開小戶縱步後庭

圍爐人散長寒煤暖日還催  
墜戶開春近郊原思夢蝶  
雪殘池館見真梅客愁宛轉  
凌雙鬢歲律侵尋寄一杯  
試繞小闌尋翠甲履痕猶占  
舊蒼苔

雲門道中晚步

層林疊巘暗東西山轉江回路更迷  
望與遊雲奔落日步隨流水赴前溪  
樵歸野燒孤烟盡牛卧春犂小麥低  
獨繞輞川圖畫裏醉扶黃髮杖青藜

渡橫溪

百尺滄浪兩岸沙，肩輿徒涉步歌斜。  
溪聲猶帶夜來雨，山色漸分雲外霞。  
岫曲斷林開鳥道，水邊疎竹近人家。  
塵埃何處尋真境，試逐寒流認落花。

次韻學士兄富陽道中

長江送客靜波瀾，路入回溪第一灣。  
石瀨橫陳潮力減，風檣圍轉櫓聲閒。  
驅除方寸無窮事，領畧平生未識山。  
自笑疎慵似中散，正宜寥落水雲間。

訪雪峯真歇禪師

紅塵白髮不相投來就僧房借板頭  
大士法中龍象貴  
老翁心外水雲浮  
長蘆江靜千山月  
枯木岩寒一葉秋  
別後相逢重著語  
牧童橫笛倒騎牛

次韻錢中伯山堂之咏

淨坊秋色老蒼顏  
檐額飛雲細可攀  
客夢偶隨疎雨斷  
僧遊常帶暮鐘還  
似聞遺錫藏銀地  
親見高人住土山  
愁絕寒江歸去路  
亂峯青處望雙鬟

和錢中伯遊東山聖泉

偶脫塵中一夢闌，欲窮幽事徧尋山。  
靜憐人境雞蟲擾，老愜僧窓枕簟閒。  
十里秋香隨屐齒，四更山月上簾顏。  
登臨物色催詩興，未信天於我輩悭。

初到連江和林公暄先輩

投老身名信陸沉，空將白髮寄遙岑。  
賦詩未敢師彭澤，抱甕真堪友漢陰。  
江面飛橋誇壯麗，山腰卧石閔幽深。  
公才清絕參竒觀，慰我長年去國心。

和陳穎仲題劉鞠祠

山繞平湖綠四邊  
雨翁遺澤到今傳  
蘋風引釣魚隨艇  
穀雨催耕水拍田  
敗壁丹青悲落日  
荒庭紳笏想流年  
桐鄉不廢春秋祀  
簫鼓雞豚久更虔

和穎仲山行即事

平蕪新綠占封圻  
橫路遊絲網落暉  
山徑人稀藏窈窕  
禪扉春盡老芳菲  
緩行照水知魚樂  
隨意穿花見蝶飛  
二子舁籃今夜月  
龍鍾猶勝杖藜歸

暇日遊石門用前韻

曉御欲隨風脚來報晴鳥鵲入檐催松幢竹蓋寶坊近  
石壁雲闌塵境回山氣得春濃勝酒花光帶月冷過梅  
却收眼力尋歸路惜取餘青莫浪開

久雨

榕根敗屋雨三椽客徑無人老更便地近東南多澤國  
霖逢甲子少豐年徑須酣飲六十日安用取木三百屨  
待得雲頭風力健梅花如雪月初圓

德甫知丞過筠莊谿亭為待月之會戲呈席上諸



友

載酒何人過子雲傳呼雞犬亦驚奔門無車馬苔侵徑  
坐近池臺竹覆尊好月邀人留晚照疾雷催雨過前村  
獨醒楚子真多事共醉愚溪百尺渾

自連江赴守鄱陽黃原道中作

海角三年一夢成北來重聽偃溪聲凝雲帶雨留愁住  
茂樹隨山送客行杭稻沿崖畦上下茅茨枕谷路縱橫  
莫從馬腹消雙鬢此地真堪老此生

欽定四庫全書

西宋名賢小集  
卷一百八十九

舟中對月

悠悠逐隊寄舟車與世真成一夢遽苦憶曉更響報鼓  
喜逢秋遠雁橫書江山似與詩人助水月應知靜者如  
投老得歸隨處樂獨醒尤笑楚三閭

留別傅才孺

壯歲追隨鬢已蒼誰將勲業問行藏憐公錯莫雞羣鶴  
顧我凌兢虎質羊敗柳亦工喧暮雨寒花直欲膩秋霜  
更謀濁酒窮清夜明日山深木葉黃

再用葉碩夫韻

一丘一壑半生中，旁舍小兒今老翁。  
歸來賦就晚徑綠，醉時歌罷春燈紅。  
壯心欲盡孤雲薄，昨夢不留寒月空。  
茗盃粥盂能事畢，四三朝暮付狙公。

題福唐郡國清閟亭

公餘自種南堦竹，好事風流今未聞。  
但得七人來結友，何須千畝比封君。  
風梢不定微藏日，雨葉初乾薄帶雲。  
自是甘棠人愛惜，不憂寒谷遇樵斤。

五言

醉帽迎風落春衣  
徑日斜花梢藏密路  
隱約見山家  
白玉千株暗青雲  
一逕斜從來少車馬  
恐是阿環家

遊梅坡席上雜酬

風約疎梅蘸石泉  
山涵弱柳借厨烟  
竹籬茅屋傾尊酒  
坐看銀鈎上晚川

次韻學士兄秋初

何日刀頭水石間  
婆婆猶得一官閒  
杖藜早晚尋幽處

望斷秋空不見山

次韻林仲和筠莊

疊疊重重兩岸山  
鈎簾秀色上琅玕  
孤亭四壁面烟雨  
人與白鷗分暮寒

題趙幹江行初雪圖

瓜步西頭水拍天  
白鷗波上寄長年  
箇中認得江南手  
十里黃蘆雪夜船

次韻郎中弟見寄

釣谿岸上千竿竹夢想猶疑玉笋班只欠吾家小居士  
杖藜風雨亦來還

兩宋名賢小集卷一百八十九